



Presbyterian Church in India (Reformed)

MESSENGER

Vol. XXX No. 04

May 2021



Happy
MOTHER'S DAY

MAY 07 Missionary Day
09 PWF Sunday/Mother's Day
23 Pentecost Day



2021 kum thupi
Nang vualzawlna hi in

Editor
Rev. Dr. Khen P. Tombing

Messenger

A monthly organ of Presbyterian Church in India (R)

Vol. XXX

May 2021

No. 04

PRODUCTION TEAM

Editor

Rev. Dr. Khen P. Tombing
C/No. 9862088190

Jt. Editor

Rev. H. Thiankhanmuan
C/No. 9774904589

Contributing Editors

Rev. Dr. G. Paumuanthang

Rev. H. Chinthiansong

Eld. B. Lutthinthang

Eld. Langkhanpau Guite

Cir. Manager

Elder C. Biaklun

thu tuunte

<i>Mialna</i>	01
<i>Bangziak a pau theihlauh..</i>	02
<i>Nang galzawlina hi in</i>	05
<i>Abraham hinkhua akipan..</i>	09
<i>Pentecost Day...</i>	13
<i>Nute vualzawlina hi di'n..</i>	19
<i>Tangthupha kalsuanna..</i>	23
<i>Bible Study</i>	25
<i>La-te Thu</i>	30

Head Office

*Presbyterian Church
in India (Reformed)
Box -32, Hebron Veng,
New Lamka 795006
Manipur, INDIA*

Subscription Fee

Rs. 20/- per copy or per month

Website of the Church

<http://www.pcireformed.com>

*A sung a thu
kisiahte editorial board
ngaihndan ahivek
kei.*

*Printed, published and edited by Rev. Khen P. Tombing at Thawmsons Color
Press for the Presbyterian Church in India (Reformed)*



MIALNA akipang VAAKNA

“Mi mial nuai a vakte’n vak thupitak a muta ua: sihna lim gam a omte tung mahmah ah vak a hong vakta hi.” – Isai 9:2

“Mialna akipang vaakna hon tuntu Jesu Khrist min manpha suang in simtute na vek un itna chibai!

April 2021 issue ah “Mialna” chih toh kisai saulou in i na houlimta uhi. Good Friday masa in Khros ah mulkimhuaitak in i Toupa ana khailumta uhi. Himahleh, aman khovel tung a zohna puang in, Easter Sunday in a thounawnta.

Watkin Roberts leh a nungzuite Manipur South District ah hong lut in chikmah a zaknailouh thu a hong gen uhi. Huai thu tuh Jesu Khrist tungtawn a hotdamna tanchinhoih ahi. Amaute’n May 07, 1910 in Thadou-Kuki Pioneer Mission (North East India General Mission a kikhek) chih Senvon khua ah hong pankhia in, tanchinhoih puanzakna nasatakmai hong nei uhi. Hiai ni tuh ei Manipur South

District a omte a ding in “Vaak” muhni a chiamteh in tunitan in Missionary Day i chi uhi.

Tulai in i Lamka khopi leh a sehvel ah revival lunggulhna ziak in thumpawl hunkhop a om ua, thupi i sa hi. Himahleh, Manipur South District a tanchinhoih hong lutna ding in, huai hun lai a theiphak nailouh gam Wales ah revival thupitak ana tung hi. Wales mite’n

Pathian piak veina nasatak ana nei uhi. Huchi in, British ukna nuai a om India a malsuah gam a tanchinhoih pawlut ding in hong kalsuan uh a, amaute'n Kolkata, Guwahati leh Mizoram tawn in tanchinhoih tuh eite lak ah hon tun uhi.

Pathian zonkhiak namte ihihna uh a Chiang mahmah mai a, kum 111 bang amin in Khristian i kichita uhi. Himahleh, a khen Chiang in "vaak"

ah i om tatakna uhiam chih hon kidong kiksak hi. Sahkhuana ngaihsak a nei himhim lou leh biakna limsakna lam a niamkiakna nasa mahmah mai hi. Kham a niamkiakna nasatak a omlel hi. Covid-19 pandemic ziak bang in tampite'n patau in Pathian lam nga mahle uh, i biakna uah niamkiakna muh ahi. Huaiziak in, simtute kuapeuh in i lah uah vaak tangkhe sak ni.

bangziak a PAU THEILOUH A THU gen

By: Pastor TK Shyam Valte

"Pau theihloua pau tuh amah kia a kibawl hoih a, thugenmin bel saptuamte a bawlhohi zaw hi. Huchi in pau theihlouhte zaw gingtute dia chiamtehna ahi kei a, gingloute'ading ahi zaw, thugen bel gingloute a diing ahi kei a, gingtute ading ahi zaw."
(I Korinth 14:4, 22)

Thupatna: Pau theihlouh a thugen kichi Christian-te lak ah kithang mahmah khat ahi. Khenkhat in Pau theihlouh a thugen ginta in thupi

bawl mahmah ua, khenkhat leuleu in lah bangmah in simlou uhi. Ayingta mite'n hahtak in tangkoupih ua; a gingta utloute'n nasatak in sawisel zel uhi. Huaiziak in, thukhun thak/ tu hun in, Pau theihlough athugen saptuam sung a thubuai huai khat hongsuak maimah hi. Tuahang in tuni in Pau theihlough zang a thugen kichi in bang honsinsak nuam hiam chih Laisiangthou tungtawn in en-khawm leng kachi hi.

Pau theihlough a pau kichi in, apau pa/nu phattuumna ding ahi.

Laisiangthou 1 Korinth 14:4, *“Pau theihlough a pau mi tuh amah kia a kibawl hoih a...”* mikhat in Pau theihlough a hongpau chiang in, amah mimal phattuumna ding agenkhia chih sawltak Paul in ana gen hi. Pau theihlough zang apau kichi Pentecost ni a, Khasiangthou hongtun in, a ngaikhia te'n aphattuum pih chiat uhi. A ziaktuh Amau pau chiat azakziak un.

Himahleh, tulai a pau theihlough zang mite leh ngaikhia te'n leng pauzat ut athei tuan kei uhi.

Huaiziak in, pau theihlough apau kichi Kha thilpiak chikhat ahihman in, mi tengteng kiang ah kipia lou a, a zangmite'n Pathian min thupina ding a, amah kia a om chiang ua, a zat ding uh ahi.

Hiai pau tuam zat kichi mimal phattuumna ding ahihman in, mipi kithuah khawmna leh biak-khawmna mun a zatsang in, mimal in ama Kha tan dungzui in zang leh Khalam khanna leh lohchinna tamtak ngahzaw ding hi. Himahleh, Kha thilpiak tang a, biakna/ kithuahkhawmna mun a pau theihlough zang om leh simmoh leh nawl khin ding hi tuanlou hi. Aziaktuh, sawltak Paul in, *“...pau theihlouhte a thugen leng kham kei un”* achi hi (1 Korinth 14:39). Huaiziak in, hiai hun leh mun a pau theihlough apau zat ding chih om tuanlou ahihman in, a zang omna ah nawl khinlouh a, ama Kha-tan bangzel a omsak hoih pen ding hi.

Pau theihlough zang apau kichi ginglou mite'n agintak theihna ding uh ahi: Pau theihlough zang kichi, ginglou mite'n Pathian

agintak theihna ding uh ahi chi'n sawltak Paul in gen hi. "Huaiziak in pau theihlouhte zaw gingtate din ***chiamtehna*** ahi keia, gingloute din ahi zaw..." (I Korinth 14:22). Hiai tang a Paul in, Chiamtehna achih Isai 28:11 a kigen, "A hi, muk lamdang pu mi zangin, pau tuamin hiai mite kiangah thu agen zawta ding". Ki-chi Pathian in Israelte Gamdai a omlai ua; ana vaulawkna kammal genna ahi. Huai tuh Mosi kiang a Pathian in vaulawkna Diuteronomi 28:49 a, "Gamlapia kipanin kawlmong apat nou honsual ding nam, TOUPAN muvanlai ngumkiakbangin a honsawl ding; a pau uh na theih louh un nam" chi a agen tangtunna ding ahi. Israelte'n Pathian toh kal a thukhun, azuih kei uleh Pathian in atheih ngeilouh uh Pau zang a, atung ua vaihawm ding ahihdan genna ahi. Hiai vaulawkna Isai in Kum zabi 8-na a, ana genkholh bang in, Israelte tung ah hong tangtung in, a theih ngeilouh uh Assyria mite'n Israelte tung ah vai-honghawm uhi. Huchi mahbang in, Pathian thutak za a, limsaklou a bengngong mite

kiang ah, Pathian thangpaihna hongtung ding ahihdan theihna ding a, Pathian in limsaklou leh ginglou mite lak a, Pathian in pau tuam zang a, thu-hongen zel ahi chih Sawltak Paul in Korinth mite kiang a hongenna/hilhna ahi zaw hi. Huaiziak in, Pau theihlouh apau kichi in, Ginglou mite'n Pathian a gintak theihna ding uh, Pathian thutak za a, Limsaklou mite'n Pathian a limsak theihna ding ua Pathian in Pau theihlouh apau honzang ahi zaw hi.

Thukhitna: Pau theihlouh a pau kichi in a tup chi-nih i genta uhi, hiai a tup nihte apan i sinkhiak theih tuh, Gingtute kithuahkhawmna mun azat ding chi ahikhol kei hi. Gingtute kithuah khawmna ah, (I Timothy 2:1) "thilnget thumnate, thumna himhimte, thumsaknate, kiphathu genna te, mi tengteng ading a bawl sak dingin ka hon hasuan" chi a, Timothy kiang a agen bang in, i kiasuan tuah ding uhi. Tuamah bang in, Sawltak Paul in, Korinth mite kaing ah, "Unaute aw, Na hongkikhop un, phatna la hiam, thu kihilh hiam, theihsakna thu

hiam, pau theihlauh hiam, hilhchetna hiam na nei chiat zel ua. Bangkim bawlhoihna ding in hih hi hen” (I Korinth 14:26). Achih bang in, I kikhop khawmnate uh, Pathian thutak a khantouhna ahah ding ahi. Tua ahahman in i biakkhawmnate ua, Mi-khat in lasak hiam, thugenna hiam aneih leh, hong kikhawm tengteng adia khantouhna ding ahahman in Pau tuamzang a, Lasak, thugen leh thilhih Paul in

biakkhawmna mun ah, zatding azahdah kei a himahleh, hon hasuan lomlom lou hi. Pau theihlauh a thugen in a tup ahahleh, Apau pa/ nu khantouhna ding leh Pathian thutak theiloute'n a theihna ding a zat ding ahi zaw hi. Huaiziak in Gingtute kithuah khawmna mun a hahzat luat louh ding ahi.

Dated:

pastor_tk_shyamvalte_028052020,
valteshyam@gmail.com

nang
gualjawlna
(Gen 12:2) *hi in*

By: Pastor T. Liankholal

Thumakai

Tukum ithupi uh “Nang gualjawlna hi in” chih, Pasion in Abraham (Abraham chipah nihangin) kung a achiam thu-4te; Nam thupi in hing siam vang, Gual hingjawl vangin, Na minthang ding a tuachi'n, Nang gualjawl na na hiding hi (Ge. 12:2). Lunglut huai leh ka hinkhua hing sukha Laisiangthou khat ahi. Mizo Pastor khat in “**Pastor moija**” chia laibu agelh na'h, A moija nei sunsun **atovang** ahi ban ah, Pastorte neih leh lam, khosah hahsa ahidan ana gial hi. Zomite Pastorte zong tua bang din mun hiveve ban ah, Pastor Zi ding ut bang nungachte

kikhaat mama ahih lai un, Abraham gualjawlna tangkha ki-umlou ade aw kachi hi.

Bang teng hitaleh, Abraham in bangza tah a Pasion deisahna tanga, Amah gin-umna leh chitakna, ama tungtawn a gualjawlna pia, Lot leh tulai a khovel gamteng a ha-leh-suan te'n khovel hausatna leh minthan na atang uh bangzah supung ua hamphat pih ahi uh chi iki kum ding hi.

1. Gualjawlna masa:

Pasion gualjawlna bang chibanga tang ding ihi chih theilou ihi man un, lam tuam² ah gualjawlna tangchiat ihi uhi. Etsahnan; Myanmar gam buai in I u'naute Zomite khovel gam teng kithedalh, a hahsatna un khovel gam tuamtuam teng law ua, gam hausa zaw leh changkang zaw nana chu; khosah dan, Inten- louten leh economy ah hing khang zaw ua, Gualjawlna deihhuai tah hing suah hi. Upa paunakin, *sai mat nang a sai ngai* achi pen uh Myanmar Zomi gaitaite leh Abraham adia poimaw khalou suak hi. Pasion in khovel gamteng a Jesu krist

tanchin hoih puan zah a deina zia a Jerusalem a gingtu umte Rome kumpi in soisa a, Suh genthei thuah ngap lou a gal taite ziah a khovel gam tuam tuam ah tanchin hoih kithedalh bang ahi(Nas.8:14).

Abraham, Pasion in a etsah ding gam zuan a apawt khiat laiin, gam nuamzaw leh a huangvul gantate uh ahing theih na ding mun suiin; kannan; Bethel leh Ai-khua Sim lam tanpha zuanin apuanbuh a suan jel laiin, tua gam ah kial nasatah ahing tung ta a, Egypt gam ah ahin thei nading suiin ava taita hi. Zi mel hoitah neih ahi zia in, Egypt Lengpa Pharoh in azi adeih gaw zia a atung a siatna atung ding zauna in, azi hina pi'n asanggam nu in agenta hi (Gen.12:11-13). Nidanglai a lengte chingdan hoih lou chikhatin Abraham zuau a gen sahta hi. Nanleh, Pasion in lengpa leh a Insung mite tung ah natna(NIV) a tung sah tahi.

Christian khat hin khua adia theih tuah mama chu, Pharoh Insung a natna atun laiin, Pharohin, Abraham tunga ka thil bawlin ka insung a hibang Pasion gawtna tung

ahi chi athei khiat thei mai, Abraham bangza taha Pasion mi ahina leh Pasion zah umna a hinkhua a sulang ade aw chih ahi. Herod lengpa'n a thupha tawi na'n; Belam, Bawngtalte, sabiltungte, Sangongsaute, Suanu leh Suapa tampi Abraham a peta hi (Gen.12:16). Abraham in thil piak a dawng te Laisiangthou ah apha zah kigial sih nanleh, tampi achi chu tam mahmah din gingtat ahi. Tulai Nungah ten a Tangvalte uh treat ua, nanleh Papi nungah saiten chu kiseng tam thei viau uh ahi. Egypt lengpa Pharoh leh tulaite zong kibang veve uhi.

2. Gualjawlna nina - Paina tenga zat thei- Gualjawlna;
(Gen-14:1-24)

Gualjawlna ichi Chiang a lungsim a langkhe pahte; Inn leh lou, Siamna leh sannate, thahat leh mel hoih etc te ahi. Abraham gualjawlna tan special mama chu; Abraham in apa Inn a nuasie lain kum-75 (12:4) ahi a, Hun sawtlou sungin chilsiamsa(well-trained) Gal sat thei mi-318 a nei hi(14:14). Tua hun lai in; Elam Lengpa-Kedorlaomer, Namte lengpa

Tidar, Shinar lengpa- Amrapher, leh EllasarLengpa- Ariok, leng-4 kigawm ten; Sodom, Gomorrah, Admah, Zeboiim leh Bela leng -5 kigawmte ahing sim ua, azouta uhi. A nei-alam teng uh lasah ua, Numei-pasal salmatin pui ua, tuate lah ah Atapa LOT zong tel hi.

Lot zong sal a pui aum ahi chi Abraham in athei tahin, a sepai chilsiamsa 318 tetoh a nung del ua, adou ua, adelza ta ua, Hobah, Damuska tandong anuadel uhi. Lot, Sal matte leh galla vante ang nua lakia uhi. Abraham akumzah etin, gal bawla leng-4 kigawmte va sualzou thei mai hatna chu; Pasion apat Hatna ahi ichilouh thei sih hi. Gal douna dinmun a dingin, thahatna pen Inn leh lou, sana-dangka sangin aman phazaw hi. Abraham in gualjawlna atan chu; Apoimawh na tenga zat thei-ken lele thei gualjawlna ahi.

Khopite lengte zatatna anga a, tahsa leh khalam ah muanhuai leh belta a hing hita hi. Sodom lengpa leh Salem lengpa Melkizedek in ana vaidawn a, Pasion thupha apeta hi. Tua hun lai a siampu lian

ana hi zia in, Abraham in, a neizou sia lah ah sawm-ah-khat ape ta hi. Pasion kipahna tungtawn a gualjawlna dong senglou in Abraham dawngin muthei khopin akhangtouw a, Ama tungtawn in ape mite gualjawl ahi jel uhi.

3. Suh punglouw Gualjawlna manpha:

Pasion in Abraham kunga a chiam, “nang gualjawlna na hi ding” chi Lot leh Abraham gan vulh mi ahizia un, Ganta hing pung seluat in, Pa-tate Insung kikhen sah tu ahing hi maita hi. Lot hinkhua anukhia lam a hichi tuh a zum huai na atua te Laisiangthou ah muthei in a um hi (Gen. 10:26-38). Nanleh; Pasion thu, Maitam bawldan, Pasion bia, sawm ah khat pia, etc Abraham leh Lot akikhen ma un tampi vei Pasion bia a Maitam bawl dante lot in theih hina piin, hausatna leh minthan na atante siatpih in, Pasion in Phaijang khopite ah Midihatt-10 amu leh khopite susiat hilou ding chia Abraham in ngetna abawl lai in, Pasion in thukim pihi (Gen. 18:32). Nanleh

midihatt mi-10 a mu zoulou ziah un khopi-4te chu haltum ahi maimah ta uhi.

Khovel tangthu bute I etleh, **Battle of Siddim or Battle of Nine kings** kichi ana sa mama khat hiin, Abraham in Gualzohna atana, sal dia puite ahut khat ban ah, gal van lah tampi alah tengteng te zia in, Lot, Khopite lengte lah ah Patawi leh zahna tang tei ding ahi chi misiamte sutdan ahi. Etsah nain, MLA/MDC election huna candidate vapanpihte elected ahinghi chiangun; Kham (Service), Loan hiam ham phatna atan bang un, Lot zong hamphatna tang ahi. Laibu ka sim khana khat in, Lot pen Sodom khopi ah member of Town Municipality Council (MDC equivalent) in pang kha ahi dan a gial hi. Hitheih tham chini. Apapi ziah a Sodom galte apat suata ahi zia in.

Himahleh, Lot din mun asang tunna leh aneih tam deu2 te Pasion gualjawlna ahi chi phawh nasangin, Pasion toh kigamla sahtu, a Zi it chikhuam suasah

tu(Gen. 19:26) ban ah, Zum huai
 tahin tanu tetoh chiha anei a;
 Moab leh Ammon (Gen,19:37)
 Israelte adia gal zauhuai leh huham
 pente asuah uhi.

Pasian gualjawlna tang Zomite lah
 ah zong mutheih in; Sum leh pai,
 Siamna, pilna, sanna etc. itang ua,
 nanleh apetu, gualjawlna naah chu

Pasian ahi chi phaw loute Chigap
 leh Lung kham na'n insungte
 luahin, Tate-Tute zong Sa leh Gal
 asuah maimah uhi. Mengkeng in
 ama tuilou a opkhum (Jer. 17:11)
 bang mai ahi uhi.

Tuami jieh in, Lot bang a I umlou
 na ding un Pasian kung ah kile in,
 Amaipha sui ni.

abraham hinkhua

akipan

vualzawlna hinkhua

zui di'n kistinmi

By : Pastor Goukhansiam Guite

Simtute navekun kumthak chibai! Toupa Nakiang uah om hen! Tukum
 2021 thupi: "Nangvualjawlna hi in" (Gen.12:02) chih, Abraham, Ginna
 a mi hangsan' chih a ompa, a tanchin Genesis Bung 11 apan Bung 25
 kikal ah chiang takin muh theih hi. I Saptuam heutute'n I kum thupi dia
 a hon telkhiak ua kipan in Abraham, ginna a mihangsan chia minloh

aompa tangthu apan sinlai a tam theipen sinkhia a gelh khiak kal kana ngaklah petmah kawm in, I Heutupa Chief Coordinator leh Pathian tung ah kipah thu kon gen masa lai hi.

Abraham Pathian'sap a aom in, a hon nutsiah di leh, a hon pawt khiaksan dia thupiak leh Asampa Pathian mahin a thuchiam a piak masakte(Gen.12:1-2):

1)A pawtsan ding:

i) Khua, ii) Tanaute, iii) A Pa' inn, hiaite'n, Sianthouna, Diktatna, Ginomna, banah, "Ginglou mite toh kituaklou pi-a hakkol puak khomlouh dia Pathian inle deih hipah ngal maithei (2Kor.6:14), "Pai inla, gam konetsakna ding lam zuan in pai in," chi'n, Abraham, Pathian sapin ana om a, amah tanchin leh sapa a omna tanchinsinkhawmin, vualjawlna hinkhua bang chia eite'n leng zui ding ihi uhiam chih kikum khawm lehang.

BIBLE CHANG TELSAWN:
 "Abraham in Pathian a gingta a, Huan huai ginna tuhdiktatna a sehsak ahi"(Romete 4:3b).

ABRAHAM TANGTHU TOM KIM:

Abraham kichi Kaldai mi, UR khua a piang, Tera tapa ahi. Abraham min khiakna tuh, "Mi tampite Pa" chihna ahi. A nu leh a pa Pathian theilou, milem bia mi himahle-uh, Abraham in Pathian thilsiamtu om ngei dia a gintakziakin a lunglut pih kei hi. Zi melhoih tak, Sara kichi a nei a.Himahleh a "chiing" a, ta himhim a nei theikei hi.

Abraham kum 75 a phak in, Pathian in a sam hi. Abraham in a paina ding manohna ding lam theikei mahleh, Asampa Pathian a gintakziakin Haran khua nusia in, a Zi Sara toh, a tupa Lot toh, a ganhonte toh TOUPA'n gam a etsakna lam zuan in hong paikhia uhi. Lampi ah haksatna leh buaina tampi a tuak ua, mihing ngaihtuahna ah bel, 'Lungkiak huaipi in kilang mahleh, Pathian a gintak zia un kuhkal takin Pathian' thuchiam a ngak kuitung hi. Pathian in chithupi mahmah a bawl a, a suante a dinga gam apiak ding ensak zihzeh mahleh, amah

kum 175 a si, kum 90 a phak tannin leng ta himhim a neikei ua, gintak haksa mahmah dinmuna a omlai unleng Pathian a gingta teitei hi. Huchi'n Pathian hunsehatun in tapa Isak a pia hi.

ABRAHAM GINNA ZE-ETNA A SINLAI:

Abraham in huchitak in Pathian a gingta a, Pathian in Abraham ginna a ze-et lai hi. Isak mahle naupang ahihlai in (Gen. 22: 5,12), Pathian in Abraham kiang ah, "Moria tang^a Haltum thillat" a laan dingin a ngen hi. Hiai pen, Abraham in a teknung ta neih, a it,deih/homthoh leh duat mahmah Isak, amah khut tektek a Pathian min a dawtlup ding chihna ahimai hi. Tua tan ah leng Abraham in Pathian soisel-selou hi. Isak hentom in maitam tung a dawtlum dia a kisak lai in Pathian in a khou hi. Huaiziakin '*Pathian Lawm*' chih in a om hi.

PATHIAN'THUKHUN HIH KIPNA: Abraham in Pathian a gingta a, kuhkal taka Pathian thuchiam a ngak zoh ziak in, Pathian in hiai a nuai a bang in a thukhunatung ah a kipsak hi:

GAMPIAKDING THUCHIAM: Kanaan gam bawngnawi leh khuaizu a luang gam amah leh a suante luah ding a piak a chiam, a taktak in, a tangtung sakinApia hi.

CHI THUPITAKA BAWLDING THUCHIAM: Hiai thu ah leng Israel Nampi suangtupa ahihna ah bukim hi (Gen. 13:16). Kham thu mah ah leng, Ginna nei tengteng Pa chih in a om a, chi thupitak mah ahi.

NA MIN KA HIH THUPI DING,'THUCHIAM: Hiai thuchiam ahle, Leitung buppi a Sahkhua lian mahmahte lakaha Judaism(Juda sabiakna), Islamism (Muslim biakna) leh Christian biaknate ah Abraham min thupitak a ngaihsang in a om hi.

VUALJAWLNA HIDING A, THUCHIAM: Nang hon vualjawlte ka vualjawl ding a, hon hamsiat peuhmahte ka hamsiat ding' chih thuchiam mahle Israel khangthu ah dik mahmah hi.

NANG ZIAKIN LEITUNG KA VUALJAWL DING' THU

CHIAM: Nang ziakin Leitung a innkuante a navak ding uh, chih thuchiam mahleng, Messia, Abraham khanggui a hong paina ah bukim in a om hi, (Gal. 3:16; Jn. 8: 36-55).

ABRAHAM TANGTHU APAN SIN TUAK (Life Application & Study): Abraham in muhtheih thilte enlou-a, muhtheihlauh'Pathian' a gintak a, a kingakngambangineiten leng, muh theih thilte; dangka, sum-leh-pai, milian, mithupite, Inn leh loute, pilna siamnate a iginnanga (koih) mailou in Pathian mah imuang ding uhi.

Abraham in Pathian adinga Isak (atapa neihsun) apiak phal bangeitenleng Pathian a dingin; ipilna, isiamna, ineih leh lam banah, I itpen leh ngaihpenle tanphaipiak ngam ding ahi. Tuni in, unaute ithilchinitawpsanzohlouh, Pathian adia kipiakkhiakna dia hondalte, tu kumthak hun ah Toupa minin bangzah itawpsan ngam a? chih kidot tham ching hi.

Pathian maiah diktat ihih theihna ding in Ginna diktak kul hi(kivel

phani). Ginna lou in Pathian pahtak mi hih vual a hihlauh ziakin, Pathian' hehpihna ziaak a ginna tungtawn a Hotdam ihi.

Abraham in Pathian hun seh a ngakzou a, Vualjawlna thupitak a mu bangeiten leng Pathian hunseh kuhkal taka I ngak zoh leh vualjawl in I omdia, ei-a kipan mah midang tenlevualjawlna ana tangsawn ding uhi.

Mihing lemgelna a pai lou a Pathian thuchiamitan/ngah masiah Pathian kiang lam zuan a i pai zel ding uh ahi. A tawptan ngakzou mite'n vualjawlna ngah ding ua, huchi'n vualjawl in om thei ding uhi.

THUKHITNA:

Abraham “*Namte adia vualjawlna*” ahih bang a eite leng vualjawlnatuntu ihih theihna dingin vualjawlna toh kisai chi 3 in genchet theih hi:

Namte'n Abraham leh a suante tungtawn a vualjawlna (passive).

Namte amau leh amau kivualjawl ding (Reflexive).

Namte'n vualjawlna tang ding (Middle).

Vualjawlna pen ei a kikholden a tawplou ding, apai sawn ding ahi. I Chief Coordinator in agen ka theih gige khat tuh, Sap (English) te'n, Pathian' vualjawlna piaksawn a sawm ua, ei singtangpa'n bel I nek gaih sawm uh," ana chih ahi. Mite adia 'vualjawlna I hihtheihna di'n, 'Piakkhiakna" ahi apoimoh. "Pia

unla hileh piak nahi ding uh"
Laphuaktute'n ana mu chian mahmah uh. A bullama i genkhitsa mahbang in Abraham kum 75 a hihin a zotna ding lam theilou in paikhia hi. Huan kum 90 val ahiah in ata neihsun Isak a pekhelai hi. Eite'n leng ibangkim Abraham mahbang a pekhia a mite adia vualjawlnaih theihna di'n simtute Tangtawn TOUPA in hon vualjawlchiatta hen! Amen.



PENTECOST DAY

khatvei kia

By: Pastor M. Khamlianmang

Tutung Pentikost Day 2021 izatna ding uah, Pentikost Day gingtute hinkhua ah khatvei kia tung ahi chih thupi in nei lehang chi'n kahon tel khia hi. I thupi achian semna ding in PENTIKOST DAY hong kipatkhiak dan leng itaklang zek ding.

Pentikost Day ichih Chiang in Kha Siangthou piak a om ni, gingtute hinkhua a Pathian Kha Siangthou nasep kilatna ni. Pentikost Sawmnga (50) chihna ahia, Greek pau in 'pente' Paikan ankuang zoh a ni 50 ni a

kizang zel ahi, Judaten buhlak ankuangluina poimoh mahmah thum a neihte lak ua Paikan ankuangluina leh Puanbuk Ankuangluina kikal a kizang Gah masa Ankuangluina (Lev. 23: 16) lopni Paikan ankuangluina zoh ani sawmnga ni ahi. Jesu leitung a omlai hun in hiai ankuangluina te, **Khatna ah**, Mosi dan piak kipahpihna, **Nihna ah** – Haithak ziak a Pathian kiang a kipahthugenna leh **thumna**, Gahmasa latna ankuangluina. Hiai ni tuh Juda ten ‘Namkipnani (confirmation day) – huai tuh kum 15/16 aphak chiang ua, Juda dan zui dia a kichiamni uh. Kithoihni hilou in kipathu genna ni ahi. Gah masa Ankuangluina ni in leng azang uh, Pathian apan vualzawlina gahmasa te tawi a kipah thugenna ni a azat zel uh leng ahi. Hiai ni in Khrist nungzuite tuh Jerusalem a pindan tungnung ah a om ua, Khrist thohnawn ni akipan sim touh a ni sawmnga ni in amau te lak ah bang thil ahong tung a, I en ding.

Nasepte laibu bung nihna isim leh i muhtheih tuh:

1. Theihlough ding vual hilou, thakhat in ging huihpi nung bang a

hong ging guih a, a kikhopna in uh a hih dimvek. Lamdang tak ahi ngei ding. Huihpi lah nunglou, kimu leng hilou a thomging thupitak ‘Kha Siangthou thilhih theihna’ thupitak hong tung hi.

Hiai thakhat a hong om guih pen hong kipatna huihkua hilou in van akipan ahi a, huihpi nung bang chih ahih lai in, huihpi mutsiat chih lam kigen lou in huihpi hattak nung hehu bang a thawm ngaihtak zak theih om ahi. Hiai te’n Kha Siangthou leh a thihhihtheihna kilang sak hi. Hiai thawmging in a tutna inn uh a hihdim vekta chih in chiam a ana omta Kha Siangthou piak ding tangtung vekta ahihna taklang hi.

2. Khalam pau a pau uh, lei meikuang bangin ahong om, amah leh amah kihawm in mite tung ah a tuang chiat. Meikuang taktak omlou himahleh, meikuang toh kibang, sat leng sasamlou, amah leh amah kihawm in mite tung ah piak in om hi. Pathian in a Kha in damna apia a, thilhihtheihna a zuisak hi. Kha Siangthou in ahong dimchiat uh. Kha in apau sak

bangzel in pau dangte in ahongpau uh. Mituamtuam pai khawm ahihhang ua athugente uh amau pau chiat bangin zathei uhi. Hiai bang thil tung tuh thillamdang, Pathian nasep leh thilhih chiang tak a taklang ahi ichihlou thei kei. Apau te uh pau thak hilou in leitung a pau tuamtuam omsate ahi,

Hiai Pentikost Ni a Kha Saingthou tang nungzui ten azakte uh leh atante uh agenzak uh.

Hiai ni mah in miten thiltung atheih un hong paikhom ua, lamdangsa in a buai hial uh. Zukham ahi uh chipawl zong om uhi. Mi'n Kha nasep ahontang chiang in, midangte nawngawn in lamdangsa in theinuan leh munuam in pum dim uhi. Nang Kha tan miten athei uhia, mite lamdangsak in na om ta hiam. Na hikhua a Pentikost Day atunni in nang mahmah in lamdangsakna, kipahna na nei hiam. Huai natan pen nagen in na puangzak hia chih kivel lehang uthuai kasa.

PENTIKOST in bang kikhekna a tun? Kha Siangthou tangte hinkhua ah kikhekna a om a, midang ten

leng amaute (Nungzuite) ah kikhekna om amuh chiang un akikhek ua Pathian nasep thupitak taklat in om zelzel hi.

1. Nungzuite nidang a thum tom mahmahte Kha Siangthou hon tan chiang un thum gigte ahong suak ua, Pathian Kha polhna thupitak a tang in kipaktak in Toupa nna asem ua midangte adi'n vualzawlina thupitak hong hi uhi.

2. Thudik thei, lah gum ngamlou ten Kha nasep ahon tang chiang un atheihte uh hangsan takin Khrist gum in thugen ua, koi munpeuh ah genchilmou in hunte azang thei uhi.

3. Kha nasep tanglou a omlai ua, pawpawt ngamlou Nungzuite Kha nasep ahon tang chiang un khovel ah kithehzakin hong omta ua, mite muh ding lau a dikkua tak a omte mite muhlouh ding lau in, hangsan tak in kalsuan ua, lohchinna piak in om uhi. Khovel pumpi ah thehzaka hong om in saptuam tamtak amaute tungtawn in dingkhia hi.

Pentikost ni a muh theih a om nawn khat tuh Kha Siangthou chiam a om hun in leng azui ding leng gen

ahi zomngal om pen Nungzuite hinkhua a kilang khia hi.

1. Thilhihtheihna tang uh a, lamdang takin Toupan zang hi.
2. Khrist thu theihpihte hong hi in athupiakte asemsuah uh.

Hiai Pentikost ni a Kha Siangthou tangte ahinkhua uah hiaini khit hundang leh mundang ah kha luah dim a omna uh genkhak a om zel manin Kha Siangthou luahdimna pen khatvei a setdet hilou ahihna kimu thei hi (Nas. 4:8, 31). Himahleh, Kha Siangthou Pentikost ni a Nungzuiten atan uh Kha a baptisna ei gingtuten leng khalam dinmun kitheihchetna, Hotdam kitheihchetna hun a khatvei a setdet ding a gingtute tan ahi chih theih khelhlouh ding ahi. A hun leh apoimoh dungzui in Kha a baptis a om te tuh kha a dimding a hihhat in I om zelzel uhi. Kha Siangthou piak a omte ihi uh. Kha Siangthou Apostol te leh gingtute kiang a hongtun in Kha in apausak bangzelin in pau tuamtuam in honpauta uh, miten lamdangsa in 'hiaia pau tengteng Galili gama mi ahi kei ua hia' achi uh. A ziaktuh amau pau bang a za chiat ahihman

un, hiai tuh Pathian nasep thil lamdang tak ahi. Mi Kha pina leh Kha pausak a om Chiang a mahni pau a zachiat uh ahi. Nang leng Kha in hon pausak a Kha in nang tungtawn a na aseping in miten Pathian thupina hon muding ua, tampi te ading in vualzawlina, nang mah ading in, na inkuan ading in, na melma nang hon doute ading in, na saptuampihte ding in, missions nasepna ading in, khotang leh gamsung ding in na hong hiding hi.

Awle, simtu ittak te, kum teng in Pentikost Day izang gige ua, kum hong thak teng in hiai ni kizang zelzel hi. Bang iphat tuampih ua, bang lam a kalsuanna inei ua, manpha leh lohching isa uhia? Gingtute hinkhua ah Pentikost Ni (Day) khatvei kia a om hi. Pentikost ni masa pen ah nungzuite leh gingtu bang zah hiamte kiang ah Kha Siangthou piak in a om a huai pen atawpna hilou in abul patna ahi ichihta. Huaini akipan in Kha Siangthou nasep gingtu te hinkhua ah avangkim in muh theihin hong om a, hun hongpai zel in athu za leh mute apan gam hong kikek in tuni in hiai tan ah I om uhi.

Gingtute hinkhua a Kha Siangthou nasep: Pentikostni masa pen ni Jesu Khrist si a thounawn khin van a laktouh ahizohin nungzuite insung khat ah om khawm uhi. Khrist a theita ua, athu sinsak te leng thei uhi. Jesu Khrist thusinsakte leh athupiakte thei khin napi a bang hang a kuankhia a athuzakte uleh sinsak a om thute uh puangzaklou a mun khat a om uh ahia? A ziak tuh amauten Kha Siangthou piak tangnailou ahiman un. Jesu Khrist thuchiamte ngak in om ua, hiai ni in thuchiam tuh hihtangtun in om hi. Kha Siangthou tunma ni 53 paita a, ahinna lou zen a Jesu thei ngeilou aih dan gen a kichiam Peter tuh sih ding lauhna omlou in a kitheihmoh khembawl pa hangsan tak a Jesu theihpihna petu hong hita hi. Hiai ahi Khrist thu theihna leh Khrist neih, tenna mite kibatlouhna. Khrist thu thei ahihhang a Amah thilhih theihna pen tangkhalou pi a om pen in bangmah tan hon tunglou ding hi. Kha Siangthou in mite lungtang a nasem a, thu aneih Chiang in thilhihtheihna leh nasem thei in koih hi. Apoimoh leh akul bang zel in Kha in gingtute nasem


sak in hihat a, ahinkhua uh lamdik a pii zel hi. Hiai tuh gingtute hamphatna leh kipahna ding thuguk khat ahi. Kha Siangthou neihna tungtawn a Pathian thihhihtheihna toh amah itheihpih Chiangin Pathiah thilhih thupite gen in om dia amah pahtawi in a om zel ding hi.

Gingtute Kha Siangthou pii in I om uhi: Kha Siangthou piina lou in hinkhua lohching gingu nasepna om om theilou ding hi. Nna khat peuh leh thil khat peuh a tangtunna ding in Kha piina poimoh mahmah hi. Lungsim, kha leh taksa a Kha Siangthou piina tellou in nopna bukim aom kei. Tulai khovel hoihlou lah setak lak ngial ah Kha piina ipoimoh diak uhi. Nungzui masa ten Kha Siangthou nasep hon tang ua, Kha pii a hong om un a omna mun ua pan hong pawtkhia in Khrist thupiak te tangkoupih leh puangzak in khovel kil teng ah kitteh dalh uhi. Laisiangthou a Kha Siangthou tang a Kha nasep tang ten banghiam khat anei teitei uhi. Ei ten leng Kha Siangthou itan Chiang in nungzuite tan bangbang itang ua, Pathian ading a thil thupi taktak hih theite ihita. Amah tup leh ngimte

sem buching ding a sap leh teel a omte ihi. Hiai bang nasep leh hamphatna itan pen athawn in bei sak mailou in semni, kuankhiani in pangni, Toupan honpii ding hi.

Gingtute te panpihtu (Helper) muanhuai neitu te ihi: Midang panpihtu poimoh lou khovel a kuamah aom kei ding. Panpihtu kinei chiat a, panpihtu muanhuai kinei veklou ding hi. Gingtute panpihtu bel muanhuai in kingahna taak ching hi. Hiai huhtu leh panpihtu (helper) tuh Kha Siangthou gintute sung a teng leh nasempa ahi. Hiai bang panpihtu muanhuai leh thupi, thilhihthei nei te'n bang ahia ilauh ding. Lunglellou in mailam nawt in kal isuan ding uh. Thudik gum in hangsang tak in Toupa Lalgam ading in masuan ni.

Mihing a kinga keini, sum ah leng muanna koih kei ni, neih leh lam ah leng lungkim sawmkeini, heutu hoih leh hoihlou te leng buaipih kei ni, mihing te apan huhna poimoh mah leh mihing apan huhna te, panpihtu te leh deihsakna ten sawt daihlou lua ahi. Panpihtu (helper) muanhuai leh thilhihthei Jesu Khrist neite ihih ziakin lunglel hetlou in kal isuan ding uh. Gam lak ding tampi a om, Toupan honpiaksa gam om a, tua lua ding in nang leh kei ikiman hiam. Kha Siangthou in nang a nasem khin hi'n na thei hia, huai Pathian Kha nang ah a teng hia, thu anei hia, nasem thei in a om hiam unau. Toupa buanni, Toupan igam, saptuam, insung, mimal hon damsak nuam in a Kha Siangthou eite kiang ah hon sawl in hon ompih den hi.



NUTE

uualzawlna hi dingin

By Nu Chiin Hoihkim

Amasa in simtute na vek un I Toupa Jesu Khrist min in Nute Ni Chibai ka hon buk hi! I niteng hinkhua a etton theih ding Bible ah Nu hunkhop i mu a, hampaha i kisa hi. Mihing a piangkhe peuhmah eimah a bukim kuamah ki omlou ahihmanin, Bible a i muh Nute leng ana bukim tuansam kei uhi. A hinkhua ua ahoihlam apan sintheih ding tampi a omlai in, ahiah diklouhte ua pan leng sintheih ding tampi aom veve hi. Hiai ahoihte apan sin ding leh ahoihloute apan hihlough ding sinthei i hihmanin i hampaha mahmah hi.

Huai ahiah dungzui in ahoihlam leh a hoihlou lam i etton theih ding, Lai Siangthou a “Namte Nu” chih a om Sarah tanchin i enkhawm ding. Sarah kua ahiah chih kidong leng, mawltak a genin, Sarah tuh Bible a Thukhun Lui a mi ahiah chin baihlam takin i dawng thei hi. Huai lou in Abraham zi, Isaak Nu ahiah chia dawng thei tampi leng i om ding hi (Gen. 17:16). Lai Siangthou a i muh Sarah tanchin apan i sin theih tamlou i enkhawm ding.

1. Thumanna: Sarah thuman dan etton huai ahiah dan Thukhun Lui kia hilou in Thukhun Thak ah zong i mu thei hi. Sarah thuman dan Peter in hi chi’n a gen hi, “Sarah in Abraham toupa chi a athuthu a om bangin thil hoih hih a khemlauna himhim lau lou a na om uleh Sarah tate na hi ding uhi” (1Pet. 3:6). Hiai ah Sarah in apasal thu amang chih i muthei hi. Athuman dan khenkhatte ‘Apasal paina peuh ah zui’ (Gen. 12:5). Ka utkei inn ah

kana om mai ding chi a paulam bawl a om maitheih ahilhai in huai bang kampau leh paulam nei ngeilou in a pasal zui hi. Huchi mah bangin ei nute'n leng i pasalte chiat uh thumanna toh zui leng chi in i kichial hi. Hiai thumanna pen anuam gige hilou in, sum le pai, tha le zung, leh khovel muha hai huai, zum huai ahihton leng om kha ding hi. Huchibangte om mah leh i pasal pen Pathian in Makai leh heutu a akoih ahimanin i pasalte chiat thuman in a thu uh zui ding in i kingen hi.

Sarah a dia thuman na laka uthuailou khat ahihleh, ahihna diktak kimkhat zanga 'a sanggamnu ka hi' chih ahi. Hiai bang a thugen masak i muhtheih ahihleh a pasal thumanna in Aigupta kumpi Pharo ma ah ahihna diktak genlou in Abraham sanggamnu ka hi chi in gen hi (Gen. 12:13-19). Huai kia leng hilou in hun hong paizel in, hiai bang thu mah Abimelek kiangah gennawn hi (Gen. 20:1-13). Hiai hunte i et chiangin Sarah pen suk thanguai leh midang zi suah theihna dinmun ah om hi. Himahleh lamdangtak in

Pathian in humbit in zahlakna leh minsiatna teng ah Pathian in hondam hi.

Eilawi hilehang ka pasal in hon itlou, a zi hon gum ngamlou a pasal dang khut ah hong pia chi in court ah i hek pah ding hi. Hiai tanpha ah leng Sarah in zum leh zah tampi thuakin a pasal thumang zou hi. Pathian in i lutang dia hon piak i pasal thu anuam a haksa, a zum huai, a zahlak huai leh a haihuai leh i supna ding hi hialta leh zong i pasal thumang peuhmah phot ni. Huai hileh Pathian in i kisaikhakpih ding mite ana thuzoh mai ding hi. I hih dia poimoh pen tuh thumanna ahi chih phawk thak ni. Sarah thumanna kimuhtheihna nawn khat ahihleh, Abraham in mikhual aneih hun ah i mu thei hi. Abraham mikhualte ahih leh a theihsa leh amuh ngei leng hilou 'Toupa Angelte zintunna' ahi (Gen. 18:6). Hiai hun ah Abraham in a zi Sarah kiangah kintaka a mikhualte nek ding bawl ding in sawl hi. Himahleh hiai hun ah leng paulam bawl sese lou in sawla om bangin nektak ding bawl pah hi. Hiai hun ah Sarah a dia paulam lemtang mahmah om

kha ding hi, himahleh bingphut a sawla om inleng thanuamtak in anasep ding ah kipei pah tingteng hi. Eilawi hile, “khawl phot aw” ahikheileh “Ka nasep lakloh” chih hiam ahikheileh “Den deuh chiah” chihte genkhiak baihlam mahmah kha ding hi. Eilam ki-etna dingin etsakna neukhat la le: Inn a i pasal lawm hong lenglate bang i chi bawl ua? Khatveivei i anneklai, singpi dawn lai hong tuakkha chihte om thei hi, huai bang hun ah bang i chi bawl dia? Hiai bang hunte ah na pasal zahna leh thuman na zia in nek ding dawn ding bawlsak a na pasal zum lou leh zahlak lou a na koih a hoih mahmah ding hi. Sarah in midangte a dia vualzawl na ahitheihna dingin apasal Abraham thu aman bangin en leng vualzawl na Nu hi dingin i pasal chiatte thumang ni.

2. Ngakzohna Kitasam: Abul patna a i gen bangin Sarah mah leng a hoihlam a etton ding hinkhua hoihaktak aneih hang ‘huchi kei leh’ i chih ding leng ana om veve hi. Pathian in hiaite nupa ‘ta neih a vualzawl na’ a chiam hi (Gen. 12:2; 15:5; 17:16). Himahleh hiai

thuchiam pen Sarah in ngak zoulou in amah lemgelna zangin Pathian thuchiam hon palsat kha hi. Hiai thuchiam pen akum uh et in leh mihing ngeina dan et in gintak haksapi thuchiam ahi. Himahleh a lehlam ah en le chitampi suang dia thuchiam ahihmanin kipahhuai mahmah ahong suak hi. Hiai thuchiam a zak ni ua pan thuchiam tangtung a, ata neih kal uh ngaklah mahmah ding un i gingta hi. Himahleh mihing lamet banglou in kum 20 bang a ngak nung unleng thuchiam pen hong tangtung nailou lailai hi. Huai bang kal ah Sarah in amah lemgel theihna hon zangin a pasal lemsakna toh a meu zang in hiai thuchiam hihtangtung hon lemgel ta hi. Himahleh hiai pen Pathian’ program a om kha hetlou Sarah program in a Sila nu Hagar tungtawnin tapa Ishmael hong piang hi. Pathian program lou na nana tuh melma nampiankhiakna hong suak a, tuni tana Israelte toh kimelmakna hong suak hi.

Hiai Sarah lemgelna in a gakhia tuh ngaihtuahtham ahi chih i thei hi. Unau Pathian zia ngaklou a ei lemgelna zang a i sep, i bawlte kivel

thak le agah khapipi i thuak nilouh bang a om a? I pasal leh i tate i awlmoh ziaka, seplouh di tantan i sep a, genlouh di tantan i gente in bang ahon gahsuah a? I kipumpei a i nasepte bang achi? I lamet ahong bang hia? Hiai bangte miten hon muh a zak Chiang un, ei gen hoih, sem hoih i kisak hangin mite mitsipna leh luaksuah na lel ana hi kei maw? Kingaihtuah ni. Pathian vaihawm i ngakzohlouh zia in, i innkuan, unau kal, leh saptuam sung leh nam kal siatna tun lel khat i hikha hia? Hiai Sarah thil hih tungtawna a gah i muh theih kichiang mahmah ahihleh unau kal kideidanna, ki melmakna a tun chih i thei hi. Hiai bang hong gahkhiak Chiangin Sarah in amah kimohsak naksang in a pasal Abraham leh a silanu Hagar ngawh maimah hi. Huai bangin i om kha hia, ei hihkhelh kimulou in mite peuh mohsa in i kaw kha mawkmaw hia? (Gen. 16:4-5). Pathian zia ngakni, amah thuchiam hih tangtung na dingin ei lemgelna leh kitaklah ngailou a amah ngakzohna in thupha ngahna hi.

3. Pathian a Thuchiam Muanhuaina:

Pathian thuchiam ngakzoulou in Abrahamte nupa zehphi mah le uh, thuchiam bawlpa Pathian a ginom zia kin thuchiam anghah veve uhi. Kum 25 nungin Pathian ginomna zia kin thuchiamta Isaak aneita uhi. Hiai tungtang hoihtakin ngaihtuah vengveng le, mihing lamah suan ding leh kisaktheihpih ding bangmah a omkei. Leitung mihingte kuamah ei hoihna ziaka Van gam luah ding i omlouh lai in Pathian in a Tapa neihsun Jesu Khrist nang leh kei mikhial sik leh tangin Khros ah hon sisak a (a muanhuaina suk buchinna dingin) Khrist hihna koppih in Van gou luahtute i hong hita uhi. Sarah te nupa leng Pathian' hehpihna leh a thuchiam a ginomna in thuchiam ta nei in Ginna Pa leh Namte Nu hihtheihna dinmun hon tang uhi. Huchiin, thuchiam a muanhuai Pa Pathian zia kin namte a dingin vualjawlna a hong hi uhi.

Simtute Toupa'n hon vualzawl hen!



TANGTHUPHA

(ROMETE 10: 14-15) *kalsuanna*
Elder Thangzo (Assam Mission Field) Sonapur.

Romte:10:14 “Ahihle, a gintak louhpi uh bangchi'n a lou ding ua? A thu a zak louhpi uh bangchi'n a gingta ding ua? Thuhilhmi om lou in bangchi'n a za ding ua? Romte:10:15. Sawl a hih kei uh leh bangchi'n thu a hilh ding ua? Tanchin Hoih kipahhuai tunte khe kilawm hi na tel e! chih gelh bang in.

Hiai sung ah Paul in Hotdamna thupidan, Juda-Jentel chih omlou, sikha leh apu hiam, numei - pasal omlou a khrist a kikimna leh kibatlualna agen zoh in kuapeuh Toupa minlou hotdam a om ding achi hi. Toupa min lohna ding, athuzakna ding, thugenmite ahon sinsakna ahi. A gintaklouhpi uh bangchi'n a lou ding ua? - Tanchinhoih(gospel) lou in hotdamna a omkei hi. Hotdamna a neihna ding un a thu azak uh ngai ahi. Thu zak ahihna ding in thuhilhmi a ngai hi. Huai hehpihna hun beikuan

ah miten Toupa min a lawh theihna ding un Paul in thil hoih thukipahhuai, hotdamnathu sinsak ding hiai bang in a vual hi.

"Eite'n thu hih ding ikeppen bel lungtang siangthou leh sia le pha theihna, siang leh ginna taktak a kipan a pawt itna ahizaw hi", achi hi. (1 Tim 1 : 5). Jesu khrist ginna diktak puangzaktu a om ding ahi.

1. Hotdamna thugen ding, thuhilhmi, a om ding ahi. khovel kiang a puak ding ineihsun uh Jesu khrist hotdamnathu ahi. Paul in,

2. Thuhilh mi in sawltu akipha mawh hi. Jesu khrist in khovel a

Pathian itna thu a gen nading in mihing hongsuahna angai hi. Amah thu a hongpai hilou in asawlpa thuneihna tawi in adeihna bang in Hong pai ahi (Jhn 5 : 37; 6 : 39). Thuhilhmi in sawltu apoimawh hi. Thugen mi in pathian leh saptuam apan thuneihna (authority) aneih ding ahi.

3. Sawl a om thuhilh mi thugen san a gintak ding ahi. Mihausa in Sheol ah Abraham angung a Lazar om amu hi. Asanggamte kiang a thugen ding in Lazar sawlding in Abraham angen hi. Pa, Abraham in, "Mosi leh zawlneite aneive ua oi; Huai mite thu ngaile uh ake" (Luk 16 : 29). Sawl a om thuhilhmite ngaikhkiak ding ahi. thugentu ding deihtel theih hilou ahi. Pathian in honsawl pen mah thugen ngaikhkiak ding chihna ahi.

4. " Thil hoih kipah huai tunte khe kilawm na tel e! " chih gelh bang in. Pathian leh mihing sawl a omte kalsuan kilawm chi in Laisiangthou in agen hi (Isai 40:9-11, 52:7). Khovel ah

kalsuanna chi tuamtuum a om a, tangthupha gen kalsuan kilawmpen ahi. Stott in a genna ah "Thuhilhmi kisawl, amaute'n thugen, mipite'n ngaikhia, ngaikhete'n gingta, gingtate hotdam a om, hotdam a omte'n Toupa minlou" Chi in a vual hi. (MATTHEW 28: 19-20; Nas 1:8) Pathian in kuan khia a khamangthangte man ding in gingtute hongsam hi. khamangthangte man a, kithuah khawmna bawl a, tua ban a saptuam phutkhe ding a sap ihi. Toupa'h " Gilsung a ka hon bawl ma-in ka hon thei a, sul akipan a na pawtkhiak ma-in leng ka hon koihtuam a, namte kiang a Jawlnei di'n ka hon sepkhinta" chi hi (Jer 1 : 5) Huaiziak in MIS- SION NA ISEPTHEIH/ IPANTHEIH hunsung bangtan hiding ahia, chih ngaihtuah in a kikhel ma-in Toupana theihtawp in sem ni.

Toupan hon vualzawl hen



KHRIST A PATHIAN' THUGUK

By: Rev. Dr. G. Pau Muanthang

Ephesate 3:1-6

Huaiziakin kei Paul, nou Jentelte ziak a Khrist Jesu hentapa in, 2Nou a dinga Pathian hehpihna nasepna piak aka omdan na zathamta ding uhi. Hiai ah Paul 'Huaiziakin' chi in a hon pan hi. Amalam sim masalou a hiai a simpan ding hile, bang gen-ut apeuhmah de aw chi a buai theih ahi. Thu poimohlou bang sim mahleh, hiai a i sin dia poimoh khat om ahihleh Lai Siangthou utna na sim a deihkaih mawk theihloun ahih dan i muthei hi. Hiai ah leng akilang chian hi, Ephesa bung thum na ka deih chi in hiai bung thumna thubul ah pan in genchet sawm mawkle, i buai dingin. Huaiziakin bung thumna i hilhchet theihna dingin bung nih na thu i theih masak poimoh chihna hong suak hi. Bung nihna pumpi i theihvek kei leh leng bung nihna tawplam bek, bung thumna toh thu kizom deuh omna chiang bek i theih poimoh chihna ahi. Huai theilou a bung thumna hilhchet chih om theilou ding chih a chiangsa ahi. Huai i theih chiangin bung thumna i hilhchian thei pan ding hi.

I gentaksa mah bangin hiai a Paul in 'huaiziakin' chi a hon thupatna kingakna ahihleh bung 2:11-22 sunga thute akinga ahi chih i thei masak poimoh hi. Huai bung 2:11-22 sunga thu om bang hi hiam i chih chiangin, Jesu Khrist ziaka nam nihte pumkhat hong suahna thu uh ahi. Ahihleh huai nam nihte pumkhat hong suah uleh bang hong chi eita? Chih tuh i theih ut mahmah ahi. Huai mah Paul in a banah hon genchian suk pah a, huai bang kipumkhatna ziakin 'Kei Paul tuh Jentelte a dingin Khrist Jesu ahentapa ka hi' a hon chi hi. Hiai bangchi dan a Paul Jentelte a dia 'hentapa' hong suak mawk hiam chih i theihut a hong suak hi. Hiai theihchetna dingin Paul hinkhua i

suut akiphamoh hi. Hiai muh geiha bang chibanga henta hong suak ahia chih a genkei, bang hentakna ahia chih leng a gen tuankei. Himahleh Paul hinkhua suut miten a hon genchiang un, hiai hun apan Paul tuh amite lak mahmah hitaleh, amite loulakah leng gelgawtna leh haksatna tampi a thuak chih i mu hi (2Kor. 11: 16-29). Huai ah tuh Jentelte a dia belseh deuh (Nas. 9:15; 22:21; 26:17-18; Gal. 1:16; 2:7-9; Rom. 1:5; 11:13; 1Tim. 2:7) ahizhiak ahi ding.

Huan, huai mite lak Tanchin Hoih nasepna ziaka athuaknate khempueh Jentelte laka nasepna ziak thuaknate leh a taka suangkulh tanna leh inn-hen (house arrest) a omnate tengteng ziakin Jentelte ziaka henta kichi hi ding hi. Huai a diktheih sawnsawn na bel amah mah in abanah a gensuk behlap a, 'nou a dinga Pathian hehpihna nasepna piaka ka omdan na zathamta ding uhi' a chi hi. Hiai a eipau a kigelh dan i et chiangin a thugelhna miten Paul thilgen pen zakha maithei, ahikheileh zakhalou maithei leh muanmoh thua a zawlpham hileh kilawm hi.

Himahleh apau bul a i et chiangin huchi dan hizawlouin, Paul in a gen-ut dantak ahileh, 'Nou a dinga Pathian hehpihna nasepna piaka ka om nazata uh, ahi kathei zataktak uh chih ka theichian hi' chi ut dan ahi. Zakha maithei ding uh chihthu hilouin, za uh, thei uh, ahih dan Paul in thei chiang mahmah ahihdan a genna ahi. Huan hiai a 'Pathian hehpihna nasep' i chih in bang gen-ut ahi ding chih theihut huai thu khat ahi nawn hi.

Hiai toh kisai in gendan tuamtuam a om thei; khenkhatin 'Pathian a om hehpihna' genna chipawl bang om, huailou in khenkhatin 'Pathian in hehpihna a nna a sepdan' genna ahi chi pawl om nawn. Himahleh hiaite hilou Paul in a gen-ut pen hi dia gintak ahileh, 'Pathian' hehpihna nasep tungtawna Judate leh Jentelte pumkhat ahong hihna uh' genna ahi chi uhi. Hiai pen Paul thugen toh kituakpen ahimanin pomtak pen kha ding hi (Rom.12:6; 15:15; 1Kor. 3:10; Gal.2:9; Eph. 3:7-8; 4:29). Huai tuh, Pathian in a piak phulou hehpihna tungtawna Khrist a thuguk hamphatna atan pen uh

genna ahi. Pathian' Thuguk kilat dan. Huchi a kilakna tungtawna Khrist thuguk ka kianga theihsaka aomdan, tuma a tomchika ka gelh banign, 4Huai na sim un Khrist thuguk ka theihdan na thei ding uhi. Hiai tang thumna 'Khrist' chih i Lai Siangthou akigelh kha hong ompen English a kigelhte tamzaw a leng aomlough manin hiai pen gelhlut louh hoizaw ding hi. Huai sangin 'huchia kilakna tungtawna thuguk ka kianga theihsak...' chih ding hong hizaw ding hi. Hiai a Paul in thuguk a gensawmpen amah mahin a tan khit, amuhkhit khat gen-ut ahi a, huai thuguk pen kei kiang mahmah a theihsak om ahi chi hi.

Hiai 'thuguk' i chih pen gendan dangin genle 'thu kisel,' ahihkeileh 'thillamdang' (mystery/hidden things) leng chih theih hi. Huai omdan tuh, amah kianga theihsaka omlou hileh aman leng theitheilou ding, huai omdan tuh taklatin omkei leh hiai 'thuguk' pen mihing zonkhiak theihlough, muhzoh ding hilou thuguk ahi. Paul in kilakna tungtawna theihsaka ka om ziaka hiai thuguk pen thei ka hi chi ut dan

ahi. Huan, hiai thupen tu kia hilou hun dangah leng ka hon genkhata chi hi. Ahihle hiai pen bang hun a agelh hi ding hiam chih theihnopna hon pia hi. Hiai ding toh kisai suttheih dan tuamtua a om. Khenkhatte ngaihnan in Paul in Ephesate kianga laithon dang khat khak a huai a gelh hi ding chi uhi. Himahleh hiai ngaihnan gupna dingin Paul in huchibang laithon a gelh ding akitheihlough kia hilouin, thuguk kilakna a gelh muh ding omlou hi. Huai banah Lai Siangthou suutmi Davies in bel, hiai a Paul in a gen Romete 16:25-27 a genna hi ding chi hi.

Himahleh hiai leng pom haksatna om zel hi. A ziaik tuh Paul in Ephesate kianga a gen ahi a, Rome a saptuamte kianga ka gelh chilou ahihziakin. Huailou in Bruce in leng ngaihnan khat nei in Paul in Kolossa saptuamte kianga a laikhak pen agenna hi ding chi hi (Kol. 1:25-27). Hiai ngaihnan gupna dingin, Ephesa leh Kolossa ahih leh kinaichik a hihziak un, hiai laithon pen ana simkhawm kha uh hi ding chi hi. Himahleh hiaite bel ngaihnan lel ahi a taktak a dikmah

e chih theihna ding omlou hi. Hiai teng sanga gintakhuai pen ahiehleh, hiai Lai Siangthou sungmah 1:9 na 'thuguk' chih a genpen mah gen hi ding chih ngaihndan ahi. Hiai ngaihndan pen pomtak ahiehna bel, Jesu Khrist nasep tungtawna Judate leh Jentelte kipumkhatna hong piantheih mawk pen mihing theihin leng thillamdang ahipah hi. Huai kia leng hiloua Juda leh Jentel muhtheih a pumkhat ahong hih mai uh hilouin ginna pumkhat ahong hihtheihna uh leng Jesu Khrist a Pathian thiltup kisel thuguk puankhatna hong hi hi.

Huai ahiehziakin, nouten leng hiai na sim chiangun ka thuguk genpen ka theihndan na thei ding uh chi hi. Hiai ah Paul in amah mitheihlough thei chi a kithupisakna leh kichapousakna a gen hilouin, huai thuguk pen Pathian' nasepa ka ngah ahi chih hiai laithon na sim tungtawn un na thei ding uh achihna ahi.

Thuguk Kilat Hun

5Tu huna a sawltak siangthoute leh a zawlnei siangthoute kiang ah Kha theihnsaka a om bangin, tumalam in mihing tate kiang ah theihnsakin

aom ngeikei hi. Hiai thuguk pen nidang leh hundang a Pathian in ana lahkhiak ngeilouh 'Tu hun' in a sawltak siangthoute kiangah theihnsakin aom chi hi. Huai omdan tuh, hiai thuguk ahiehkeileh thillamdang pen Pathian thuneihna nuaia, aman a ut hun khata alah khiak ahi chih a chiang hi. Huai in mihing in kilakna leh thulamdam muh ut ziaka thilhih dan khenkhat a diklounna a langsak hi. Mi khenkhatin Pathian apan kilakna muh sawmin mahni taksa kithunun, tuamom (asceticism) leh kisukna nei uhi. Himahleh, hiai a Pathian in kilakna, leh thuguk a lah khiak pen mihingte vazonhat thu hiam hizawlouin Pathian in ami sehte, a chih huna lahkhiat ahiehndan i muthei hi.

Tumalam in huai bang kilakna leh theihnsakna mihing tate lakah om ngeikei, himahleh tu in bel 'sawltak siangthou leh zawlnei siangthoute' kiangah Kha in a theihnsakta chi hi. Hiai bang kilakna piaka omte ahiehleh 'a siangthou' sawltak leh zawlneite a chisese hi. Bangziak hiam i chih leh amaute nasepa siangthou sem dinga koihtuamte

ahihziak uh ahi. Huai leng amau utthu leh kithunun zohthu hilouin 'Kha' in a piak, ahihkeileh 'Kha' in a thop hilai hi (1:17).

Hiai sunga i mutheih poimoh mahmah ahihle, thuguk theihna, kilakna, thuguk leh thillamdang theihnate mihing zonhat thu sangin Pathian' piak ahi chih hon musak hi. Huaiziakin, tulai a pautheihlauh a pauthei dia kizil, thillamdang hihtheih utna ziaka kisuk chihte toh hong kigamla deuhleh kilawm sakna om hi. Huai Thuguk ahihle 6Huai thuguk hiai ahi, Tanchin Hoih ziakin Khrist Jesu ah, Jentelte goulahpihte, pumpi hiangte leh thuchiam tanpihte ahi uhi.

Paul in a thuguk gengen tuh hiai ah ahong genkhe khong hi, huai tuh: Jentelte goulahpihte leh pumpi a

hiang, leh thuchiam tanpihte ahong hihna uh ahi chi hi. Hiai ahih leh mihing ngaihtuahna dan a thil hitheilou ahi. Aziak tuh Judate Pathian namtel, a gouluah dia a tel leh a thuchiam tanpih dia a telte ahihlaia Jentelte huai bang hamphatna a hong tan mawk uh tuh thillamdang ahilou theikei hi. Himahleh Pathian thilgel ah bel hunseha lahkhiat, phoukhiat ding, himahleh huaibang hun tunma teng tuh thil kisel, leh thuguk ahi. Jentelte hotdama hong om ding chih kia mai hiloua Juda leh Jentelte tan kibang, goulahpihte, pumpi khat leh thuchiam tanpihte hong hihkhawmna uh tuh thulamdamg i chilou theikei hi. Hiai pen thildang ziakin hilou in Jesu Khrist palaina nasep ziaka hong hitheih lel ahi. Huaiziakin Paul in Jesu Khrist a Pathian' thuguk a chi hi.

**“Second coming thu eite'n i gen uh
himahleh khovel mi
kimkhatte'n
first comming thu a thei nai kei uh”
- Oswald J Smith**



LA-TE' THU

La min: "Khawl Theih Hilou"

Haksatna mun a pangngam in Toupa na i sem ding,
 In leh lou paisan akul Toupa nasem di'n zaw;
 Gimna ah zong lung kelou thuakna mun a tai lou,
 I khros mah i puak a kul ahi.

*Khawl theih hilou Toupa gam a di'n,
 A nuamlou a haksa bang teng ah zong;
 Thuakna leh supna lou in, Toupa Na kisem theilou,
 I Toupa a di'n isem ding uh.*

Toupa'n ei adia a thuaknat dante lung a gel in,
 A nasepna tawl ki sa'n lunglel in om kei ni;
 Koi mun ah hizong Aman hon deihna mun peuh ah,
 Amah di'n i sem kei ding ua hiam?

Toupa gam nasem lou namte mangthang ding ahi uh,
 A nasemlou nam ihih in zaw i mangthang ding;
 A gam a di'n kipe le'ng ei di'n i damna hi,
 A nasem minam ihi ding uh.

Hiai laa kilawmtak Pu T. Pumkhothang in Feb. 20, 2015 a ana phuah ahi.

Phuahna san:

Pathian nasepna ah lungkiakna tamveipi kana tuak a, ka seppih tampite leng gim kisa a lungkia tampi ka mu hi, himahleh Pathian nasepna khawl theih hilou ahih dan leh, Pathian nasep keimah sep ding a Aman hon

deih ahi chih lungtang sung ah ding leng om ahi, tuate tellou a
 hon phawksak in, leh Toupa Toupa naa kiseum thei lou ahi,
 nasepna a lungkia tampite a ding himahleh khawlthei ihi kei ua,
 a thahatna petu laa phuah ding Toupa a ding a i sep ding uh ahi.
 lunggulhna hong piang in hiai laa Bible in “*ka nna sem nuamlou*
 Toupa’n a hon pia hi. Toupa min *nam tuh a mang thang ding*”
 phat in omta hen! achi, i minam himhim zong
A Thu Tuun: Toupa gam Nna Toupa nasepna a ut mi hi ni hang
 sepna ah taan ding om a, thuak chihte ahi.

Laa min: “A Gam Vang In”

Tangthupha vang in i semgim in i tawl hiam aw,
 Aw A gam vang in i genthei maw?
 Tua i thuaknate i tunung a i tan ding toh;
 Phulou in simtham a hilou hi.

*Simlei ah gentheihnate thuak in i mau zong a,
 Aw A gam vang in i lelliang in bangteng i taan zong;
 Thupi a vanglian i Toupa bang a i om Chiang’n,
 Gimna i thuakte tung ah zohna lasa in,
 Denchiang i leng ding.*

Aw! i ginnate a bah in tawl in a om maw?
 Lunglel a om in a nguigawp maw?
 Muhtheih enlou in i pai ding hi i ginna toh,
 Van a thil omte i mitsuan ding.

Gimna tampite i thuak in van-gam i lut ding,
 Tun ah gimthuak huibang i mau lel;
 Aw i ngaklah ngei Pathian tate thupi hun ding,
 Van a aksi bang i zem hun ding.

Hiai laa Pu T. Pumkothang in March 4, 2013 a ana phuah ahi. kum in Rome 8:10 pansan in hiai laa Pathian in a hon pia hi.

Laa hong piandan:

Missionary nasepna lam toh kisai laa phuah ding ka lunggulhna a sawtta a, a diak in missionary a kuante hanthawntu ding leh, missionary na sepna lam toh kisai la phuah ka sawm sek a, himahleh ka phuak khethei zok kei hi, 2013

A Thu tun:

Haksa tampi thuak a Toupa gam Nna i sepnate Toupa'n thupina hon piak ding toh tehpih tham hilou ahih dan phawk kawm a Toupa na sep lunglel lou a sep ding chih a gen ut pen ahi. Toupa gam nna i sem zel ding uh.

Source: <https://pumkothang.com/>



Mimbung Presbyterian Church te'n saptuam summuhna ding gelna in lou khou in kilohna nei uhi. Apanna te uh Toupa'n vualzawl hen aw

**“We must be global christians
with a global vision
because our God is a global God”
- John Stott**

Naupang itna toh keem...
L ungtup mualsuah ding a hanchiam khe thei ding a sinsakna..
Siamsinna in akentel talent tuamtuam pholhkhia...
Rayburn High School ah...

RAYBURN HIGH SCHOOL



A School Committed to ...

- » building a solid foundation for a stronger and lasting education.
- » a unique teaching method that makes a child better Intellectually, physically, mentally and spiritually.
- » stimulating a child's imagination.
- » motivation for a child education and career building.
- » our system where children learned by doing.
- » present day system of education.

credo

EXCELLENCE IS OUR GOAL

PERFECTION IS OUR ENDEAVOUR



Learn, Labor & Serve is our MOTTO

ALL FOR JESUS

IS OUR THEME

Address:
New Lamka(H), Churachandpur
Manipur - 795006
+91 -7085644539

Or Visit Our Website : www.rayburnhigh.org

If undelivered, please return to:

The Editor
PCI Messenger
P.O. Box-32.
Presbyterian Church in India (Reformed)
Head office : New Lanka (H) 795128
Manipur, INDIA



to:



SINGNGAT RAYBURN SCHOOL SEMTUTE LEH NAUPANGTE

